

## Die AGF bräsendiert:



## Hochwasser

..... so langsam iss bei uns widder Alles uff soim alde Blatz.

Meer hänn nämlich die Woch schbeet owends gemerkt, dass in unserm Allzweck-Kellersche alle Regale drobbsen unn de Bodde voll Wasser iss. Die Brieh iss vunn de Deck runnergedrebbset unn hott sich iwver unser ganze Vorräte unn unsern Gruschel hergemacht. De Schwiervadder hott gemähnt, do muss alles raus, annerscht kammer nit an dess Wasserrohr. So hämmer also noch in de Nacht unser Sammelsurium vunn 37 Johr Eheschdand, beschdehend aus dausend Dose, Dippscher, Gläser, Gedränkekischde unn zwää Millione Glänischkeide ausgeraamt unn in de ganze Wohnung unn im Freie verdäält. Dess alde Holzregal, wu bis an die Deck gange iss, hämmer nit durch de Gang gebrocht, weil sisch do inzwische enn Schuhschrank brädgemacht hott. Nooch langem Brobiere hämmer dess Ding schließlisch middem Hammer zammegewesche unn breckelschersweis nausgeschlääft. Am negsche Moje noch die Grummbeere, Zwiwwle unn anner Zeig ausgerahmt unn dann war endlich die Wand frei zu begehe.

De Vadder hott dann mojens feschtgschdellet, dass dess Wasser vunn owwe aus soim Druckschbieler im Lokus kummt. Dess hott die Wand durchnässt unn iss bis nunner zu uns durch die Deck gegrawwelt. Der Schade war reladiev schnell behobe unn mehr hänn dann doogschdanne wie die begossene Pudel, mit unsere Habseelischkeide, die merr vollkommen umsunscht ausgerahmt ghatt hänn.

Also - alles widder zurigg - awwer wuhie ? Unser Regal war jo im Äämer. Gemesse unn gereschent unn beim Bauhaus e neijes Regal gekaaft - kunschtgerescht oigebaut unn dann 2 Daag lang den ganze Krempl widder akribisch oigerahmt.

Äh Guudes hott die Sach jo dann doch ghatt: So schää uffgerahmt hett merr unsern Vorratskeller freiwillisch im ganze Lääwe nit. Die Leit, wu de Glaskondääner leeren, werren sisch wunnere, wo bletzlish dess viele Altglas herkommt.

Jetzt kämmer widder afange, alle meglische Gläser unn Dose zu sammle - meer hänn nämlich jetzt viel mäh Blatz wie vorher.

Walter Rupp



# Mit Schwung ins neie Johr 2006

Kaum isses neie Johr ogebroche, do hän a schun widder die Verostaldunge im Vorort ogfange.

Sundtag, de 8. Januar 2006 waren alle Bürger oigelade vun de Ordsverwaltung des häßt nadierlich a un im Besondere vum Ordsvorsteher, sprich: Dietmar Borth. Net nur als Pressefraa, sondern weil ich a selbschd halt gärn uff die Ordsfeschdelscher geh (do kanschd wennigschdens was drinke, weil'd hämlaafe konnschd), hab ich mich mit moim Mann uff de Weg gemacht un meer sinn in die TuS-Hall geloffe, um dess zu erlewe. Im letschde Johr hot dere Verostaldung e bissel Pepp gfehlt un dess hab ich a öffendlich kridisiert. Un was soll ich eich Leser sage: Dessjohr war's werklich en zauberhafte Nochmittag.

Am Oigang iss merr schun mit me Gläsel Sekt vum Ortshäuptling und soiner Fraa Jarmila mit Dochder Lucia begrießt worre (wu gibt's dann heit noch so e gudes Getränk koschdenlos?). „S Oischenke hän TuS-Fraue iwwernumme die zwä mit de Initiale M.B., nämlich die Monika Baumgärtner un die Meike Baumann (Reschbekt, die sinn immer sehr hilfsbereit!!).

Jeder hot jedem und jedi jedere wu kumme iss gut gelaund e gudes neies Johr gewünscht (manche hän sich a e bissel abgebusselt) un dann hot mer sich en Platz gsucht. Im Nu war doch de ganze TuS-Saal gschdobbdevoll „s soll joo niemand sage, dass die Leit kä Intresse an so was hedden.

Dann is a noch de OB vun Frankdedahl kumme, nadierlich de Theo Wieder un widder kann ich denn Mann nur lowe. Jedere und jedem hodder die Hand gewwe, egal, ob ald oder jung, schää odder net un e gudes neies Johr gewünscht und e paar freundliche Worde gsaat. En Mann vum Volk, ferrs Volk kann ich do nur sage. Dess finn ich prima.

Un schun isses Programm uff de Biehn losgange.

Im foine Zwirn hot de Gilbert Laub (dess iss awwer kenn Flomerschummer, gheert awwer zum Elferrat vun de Zwiwwelböck un iss en ganz symphatische Kerl män ich) dort owwe ogsaat, odder wie dess so schee häßt: die Moderation gemacht.

Als erschdes iss de Chor vum Bund Freundschaft uff die Biehn gange, hod sich uffgschdellt und dann drei wunnerscheene Lieder gsunge (dodebai war a dess scheene Volkslied „Das Lieben bringt groß Freud“). Ganz konzendriert waren die Männer, ständisch mit Blickkontakt zu ehre Dirigendin Karla Kronenberger (eijo, die iss hald a noch jung!!), die hott de Ton ogewwe und nadierlich a mit zwää Ärm dirigiert. Do hotts glei kräfdisch Beifall gewwe. Dann hot de MGV-Vorsitzende Peter Kuhn noch e Spende an die AGF vun 423 Euro üwerreicht. Dess war dess Geld, wu die Besucher beim wunderbare Weihnachtliederkonzert vum Bund Freundschaft in de kadolische Kerch am

vierte Advent 2005 als Spende gewwe hän, weil's ken Oitritt gekoschd hot. Ach, un noch e Spende is oigange. De Michael Gaida, wu die scheene CD-Rom (ehr wisst doch, die Silwerscheiwe zum Oilegge in de Rechner vum Combjuder) vun de Flomerschummer Bilderausstellung un de bund bebildert AGF-Chronik gemacht hott, der iss uff die Biehn un hot de AGF nochemol 460 Euro vum Verkauf iwwegewwe. Do hot de AGF-Vorsitzende Rainer Hannemann gstrahlt und gsaat „Dess neije Johr fangt jo gut o“.

Dann hott unsern Ortsvorsteher all minanner noch mol begrießt, ,s Volk, die Gäscht un do waren nadierlich a die Brominente debai. Die kann ich gar net all uffzehle. Die waren vum Stadtrat, vum Ortsbeirat, vun de Arweidsgemeinschaft, vun de Vereine. Ich hab so bei meer gedenkt: Do scheinen jo manche wirklich gern in Flomerschumm zu soi, weil Wahle gibt's jo net! Halt, doch, ,s kummen jo die Landdagswahlen in Rhoiland-Pfalz am 26. März!! Awwer so derf mer net denke, sondern äfach glaawe, dass die ganz Politbrominenz nur wege de gut gelaunde Flomerschummer un de Verostaltung selbschd kumme iss.

Un dann hodder los gelegt, unsern Dietmar Borth. Vun de Gschehnisse in Europa un im außereuropäische Ausland hodder geredd, vum Feuerwerk an de Börse, vum Hans Clarin, de Ilse Werner, em Ephraim Kishon un em Max Schmeling, wu nimmi unner uns sin, hot e bissel in die Bundesbolidik geguckt, hot de deutsche Papschd erwähnt un de FCK („die sinn so gut wie abschiedeje, mänen Kabareddischde“) un dann hodder noch gsaat: „Aber überlegen Sie mal selbst, können sie sich 365 Tage lang 0 6 vorstellen?“ Heer, do war ich awwer iwverraschd. Hodder jetzt dess Johr 2006 abgekerzt, weil's em so lang zum Babble war odder hodder vielleicht null Sex gemänt? Ach, halt, dess häßt jo null sechs, dess sinn jo Zahle - Jahreszahle!!

Uff die schlimme Nadurkatastrofe isser oigange in New Orleans, in Thailand, Indien, Malaysia, Sri Lanka, Pakistan, hot erwähnt, dass uns dess alles schrecklich lääd dud un hot en Moment um Stille gebede. Recht hodder mit soiner Aussag ghat, dass manche Konzerne högschde Gewinne machen, awwer zum Nochdeel vun de Bürger die Strompreise erhöht werrn un die Mitarbeiter die Arbeitsplätz verliern. Dann isser e bissel zum Flomerschummer Gschehe un e bissel mä zu Frankedahl kumme. Er iss noch emol uff die letschd Ortsvorsteherwahl oigange und hot gsaat, dass diejenische, diejen nimmi hawwe wollten, dess jetzt halt mit Fassung trage missten. Er selbschd det's jo a un demogradische Entscheidung misst merr halt akzeptiere. Bedankt hot sich unsern Ortsvorsteher bei de Mitglieder im Ortsbeirat un bei

denne in de AGF un nadierlich a beim Rainer Hannemann ferr die „freundschaftliche Zusammenarbeit“. „Sie haben das hiesige kulturelle und gesellschaftliche Leben in vielen Veranstaltungen im Jahr 2005 bereichert und ich hoffe weiterhin auf eine faire und gedeihliche Entwicklung zum Wohle unseres Ortes“ hodder, nadierlich uff hochdeitsch, gsaat. Junge Leit hodder gebede, sich ferr's Ehreamt zu ongaschiere. Ferr die Stadt, so hodder feschgdschdellt, siehder kä positivi Entwicklung, weil die Schulde immer mä steige deden.

Kridisiert hodder a de Vorschlag vun de Bürgerinitiative Grundwasserschutz in Frankedahl, weil die en diefe Grawe im Weste um Flomerschum vorschlaggen, der laut Borth 12 Meter bräd un 4 Meter dief werre soll. Dodemit wollen se dess viele Grundwasser ableide. Awwer mit ihm wär dess net zu mache, hott de Herr Borth gsaat.

Doch soi Redd war noch net ferdisch. Bund, Länder un Kommune dirften sich net länger um e Finanz- un Strukturreform dricke.

An erschder Stell in Flomerschumm det soin Wunsch noch demm Stromkaschde, sprich Stromverteiler ferr de Kerweplatz stehe, wu schon 2.600 Euro an Spende oigange sinn. Ja, so sinn se halt die Bürger, wann se oisehen, dass dess Wunschprojekt ferr all was daucht, dann spenden se a. Do muss merr die Gemeinschaft widder mol lowe.

Un weil bei de Stadt die ganz Zeit vun alle Sportblätz un a vun denne in de Vororde außer vun Flomerschum - geredd werd (auf hochdeutsch: Sportstättenleitplanung) un noch nie de Platz beim TuS erwähnt worre iss, do hott de Ortsvorsteher gsaat „Auch der TuS Flomersheim darf bei der Sportstättenleitplanung nicht zu kurz kommen“ (do fehlt nämlich a en Kunschdrase, wie er jetzt zum Beispiel ferr de Nochberort in aller Munde war). Gleiches Recht für alle so häßt dess, gell?

Un vorgschlagge hott unsern Dorfowwerschde noch, dass de Parkblatz gejeniwwer vun de Bäckerei Walz vielleicht en Name krigge soll: „Alter Grundschulplatz“ (dess det meer persönlich gfalle, weil doch do ganz frieher die alt Schul gschdanne hod).

Nur damals hot merr jo noch net Grundschul, sondern äfach Schul gsaat. Also wär moiner Moinung no „Alter Schulplatz“ besser wie „Alter Grundschulplatz“. Awwer dodefor hämmer jo de Ortsbeirat, ferr sich Gedanke zu mache.

Un widder mol hodder plädiert ferr e Ortsumgehung, weil merr so schrecklich viel Verkehr uff de Fränsemer un Eppstäner Stroß hän. Dodevun trää mt er jo schon zischjohr.

Gell, viel hodder gebabbelt, unsern Ortsvorsteher? Moiner Meinung noch zu Flomerschum selbschd e bissel wennisch. Dodebei is do a e Menge bassiert, wammer mol so ,s Johr Rewü passiere losst. Awwer vielleicht hot en jo ,s

Weltgschehe mä g'fesselt, dess kann jo soi.

Unsern OB Theo Wieder hott a Neijohrsgrieß uff de Biehn gschbroche, Uffs „konsensorientierte Klima“ in Frankedahl kennt merr besonders stolz soi. Wischdisch wär in de „demokratische Kultur“, dass merr mit Rücksicht, Toleranz un Verständnis uff de annere zugeht. Jeder Bürger vun de Stadt (un do zehlen jo bekandlich die Stadtteile, sprich Vororde mit), wär e „Ich-AG in Sachen Gemeinwohl und Einhaltung von allgemeinen Spielregeln, wozu Rücksichtnahme auf die Interessen und Bedürfnisse anderer Menschen gehören“.

Do hodder gemänt, dass merr beispielsweise die Gschwindigkeits- un Parkvorschrifde uff de Stroße oihalde un sich gegeseidisch unnerstütze soll und dass merr a soi Oikaafsverhalde iwwerbrieft misst. „Wenn sie im Flomersheimer Supermarkt nicht einkaufen, sondern den ganzseitigen Verlockungen großer Supermärkte in der Nähe verfallen, dann wird es diesen Markt in Flomersheim in absehbarer Zeit nicht mehr geben“, hott de Verwaltungsschef gsaat un leider hodder dodemit jo soooo recht. Dess derf merr sich gar net ausdenke, wass dess wär, wammer in Flomerschum kän Oikaafsmarkt mä hedden. „Wenn wir uns bemühen, mit Rücksicht auf andere zu leben und sinnvolle Rahmenbedingungen für ein gemeinschaftliches Leben zu schaffen, dann haben wir weniger Probleme. Wir leben in einer schönen Stadt, in einer schönen Region und Sie in einem schönen Stadtteil. Hodder dess net schä gsaat?“

Un de Rainer Hannemann hott vun Flomerschum rischdisch gschwärmt. Mit faschd 70 Verostaldunge un örtliche Termine ded e „ereignisreiches und aktives Jahr“ hinner uns ligge. Un de neie Flomerschummer Verostaldungskalenner ded uns zeige, dasses genauso aktiv weitergeht. „Wir werden uns auch 2006 zu den aktivsten Vororten zählen dürfen und darauf können wir ein klein wenig stolz sein“, hodder gsaat, de erschde Mann in de AGF. „Ohne die Mitwirkung Ehrenamtlicher und ohne Ihre Identifizierung mit dem Geschehen im Vorort blieben alle Vorhaben und Planungen nur eine Absichtserklärung. Nehmen sie rege am Ortsgeschehen teil und unterstützen sie damit die Arbeit der Verantwortlichen. Bringen Sie sich auch selbst aktiv ein und Sie werden feststellen, dass es ein gutes und erhabenes Gefühl ist, etwas für die Mitbürger und die Gemeinschaft getan zu haben“.



Ei dess hodder doch a so schä gsaat, odder?

Dess waren die Grußworde zum neie Johr un jeder hot sich e bissel was zu Herze nemme kenne.

Doch uff de Biehn war noch einisches los. Die zwä Danzmariecher vun de Zwiwwelböck hän die Bä gschmisse un Flick-Flack, Rolle un Spagat gemacht. Uff die Svenja Leppert un die Nadine Tups kennen net nur die Zwiwwelböck sondern a ehr Eltern mords stolz soi, män ich. Un Beifall hotts gewwe die Leit hän wie verrickt geklatscht.

Ja, un unsern Ortsvorsteher hot jo so e talendierdie Dochder, dess wissen sicher a net so viel Leit: Die Lucia hot de Mut ghat mit ehre verzeh Johr mit em Saxophon uff die Biehn zu gehe un zusamme mit de Karla Kronenberger (die war am Kieboard) als Duo e echdes musikalisches Heileit (kummt vum englische Highlight) hizuzaubre. Drei Musiksticker hänn se gschbielt. Englische Titel hän se ghat („Yesterday“, „Over the Rainbow“ un „Amazing Grace“), awwer wer die Musik kennt, hot feschdgschdellet, dass dess sehr gfühlvoll geklunge hot - doll !!

Nowum beim Neijohrsempfang, soll häße, dess war des allererschde Mol: Do hott doch de TuS-Tanzkreis e Formation vumme Boogie-Woogie oistudiert ghat un die fünf Paare hän dess de Leit vorgführt. Ei dess hab ich klasse gfunne. Do hett merr gärn länger zugeguckt un selbschd hotts ähm in de Bä gejuckt bei dem flodde Dänzel. So musses soi, dass alle Vereine mit me Beitrag so en gemiedliche Nachmittag verscheenen. Reschbekt!

Un zum Neijohrsempfang ghort nadierlich a immer die „Machtübernahme“. Ehr wisst net, wass dess iss? Do wollen die Narre die Macht, weil jo die sogenannt fünft Jahreszeit ogebroche iss, und die gheert de Fasnachter. Un die wollen dann regiere un schicken de Dietmar in die Wüste, dess häßt, er hott bis Aschermittwoch nix mä zu sage. No ja, er hott jo beim Neijohrsempfang noch genunk gsaat.

Ei so sang- und klanglos hodder die Regierungsgewalt noch nie hägewwe. Do kennt merr jo grad mäne, er wär froh, dass er des ganze bolidische Hickhack mol los wär. Nur isses halt so, dass er wohl odder iwwel in rund fuchzisch Daag widder uff so in Ortsvorstehersessel muss, obber will odder net, weil beim Heringsessen vun de Zwiwwelböck kriggt er soi Macht widder zurick.

Also denn Ortsschlüssel (der wär zum Uffmache vom närrische Tresor, hott de Dietmar gsaat) hodder ganz schnell abgewwe. Inzwische waren nämlich die Zwiwwelböck (die feiern grad ehr Jubiläum 5 x 11 Johr Bestehe) mit me

Klatschmarsch vum Publikum mit re große Streitmacht uff die Bühn kumme un hän a noch ehr Prinzessin Kristina I. aus dem Hause Kraus (un vum Regierungssitz Zwiwwelburg) mitgebracht ghat. Die war grad en Daag vorher in Frankedahl un hot mit de Zwiwwelböck ,s Rathaus gstürmt un em OB Theo Wieder die Regierungsmacht abgenomme. Un dodebai isse Stadtschlüsselprinzessin worre.

Also dess scheene, liebeizende Mäde mit ehre Charm hott denn Dietmar mit Sicherheit werres gemacht. Mit ehre große Aage un ehre goldische Lächle hott sen nur ämol oghimmelt un wegg warer. Schneller wie merr gucke gekennt hott, hotter de Schlüssel dem Zwiwwelböck-Präsident higstreckt, uhne viel Worde un dodebai nur die Lieblichkeit ogeguckt. Ich saag jo, der Mann war verzaubert.

Un de Zwiwwelböck-Präsident namens Martin Dommermuth, denn muss merr a mol kenne gelernt hawwe. Ein schlagfertiger Borsch iss dess, immer e Spässel uff de Libbe („ich seh heit wege demm wennische Schloof wu ich heit Nacht widder wege de Fasnacht ghat hab aus wie en jabanische Faldehund...“), der hot Temperament, singt gärn un verstehts uff soim Präsidendeposchde.

Was merr uffgfalle iss: Eigentlich werd a immer noch ,s Steiersäckel zum Ortsschlüssel iwergewwe, diesmol net. De Ortsvorsteher werd gedenkt hawwe, do iss sowieso nix drin un die Leit hän sowieso seit em Teuro kä Geld mä, also kennen's die Zwiwwelböck a net fille un do hodders äfach in de Schublad in de Ortsverwaltung gelosst.

Ach, wass ich noch verzehe wollt: die Kristina I. hott nadierlich a ehr Proklamation vorgelese und hott all begrießt „im Jubeljahr der Zwiwwelböck“. „Ab jetzt haben die Narren das Regiment“ hott se wisse losse. Un dann hott se was gsaat, dess hab ich doll gfunne: „Lachen ist ein gutes Ding, das beste auf der Welt und wenn du nicht mehr lachen kannst, ist es schlecht um dich bestellt“. Iss dess net werklisch wahr?

Do waren a die Marianne Nickolaus un die Elsbeth Hörth (die zwä gehn als in die Bütt bei de Zwiwwelböck und berischden vum Ortsgschehe) so higerisse, dass se e Gschenk an die Stadtschlüsselprinzessin Kristina I. iwerreicht hän.

Ja, jetzt hab ich alles bericht dess iss jo en halwe Roman worre un ich hoff, ich hab nix vergesse. Un ich hoff nadierlich a, dass ehr all Spaß am Lese ghat hän un jetzt a die, wu net in dere Verostaltung waren, genau wissen, was los war.

Es griebt eich wie immer die Ursula  
- eier Pressefrau -.

# E paar pälzer Gschischdelscher aus Wien

(zu demm Beidrag vunn de Brigitte Sokop aus Wien muss merr vorher erwähne, dass sie in Wien enn digge Wälzer iwwer die Gräfin Marie-Louise Larisch-Wallersee - Vertraute der Kaiserin - veröffentlicht hott)

Do grigg isch vor zwee Joa an Ooruf vun em Mannemer, der grad mit soim Freind aus Haßloch uff Besuch in Wien is. Un der verzeht mer, er war grad innem Andiquidädelaade, wu er k. un k. - Sache gsuchd hot, un do gebbt ihm a Fraa, die wu des ghort hot, e Zeidung aus Münsche mit me Leesebrief vun mir drin, weil in Bayern grad e Fraa e Baron gheirat ghabt hot, bei dem se e Joa vurher uffgedaucht is un gsaat hot, sie wer an Abkömmling vun "moiner" Gräfin Larisch un so e Verwandte vun de Kaiserin Sissy... un die Zwoggel ham do grooße Ardiggel in de Zeidunge gemacht... un weil des iwwerhaupt nit schdimmt, was die vun sich verzeelt hot, hab isch hald e paar Brief losgelosse.

Un ääner vun denne ham die zwee do in Wien gsee un misch agerufe. Mir ham uns glei gedroffe un do schdelld sich raus, daß die die nei Baronin schunn long kennen un wisse, daß die immer schun e Schloß un en Tiddel gsuchd hot un verzeelen uns noch so e paar Gschischdelscher...un weil ihm Opa "Larisch" gheese hot, un sie moi Buch griggt hot, hot se sisch donn oigebild, daß se doch e Großengelsche odder so was soi kennt vun der Gräfin Larisch... .Na ja, jedenfalls kummen der Mannemer un der Haßlocher immer widder noch Wien un mir quatschen donn vun de Palz un was uns schunschd noch oifalld. Un jedzt kennt er eisch aach denge, wie isch zu denne Doose Lewwerworschd un Saumaage kumm in moim Kiehlschronk....



\*\*\*\*\*

Die Kinner innener kadoolische Volksschuul schdehen in ääner Reih fers Middagesse. Am ääne End vum Disch is a grooße Schissel mit Eppel. Die Nonn schreibt e Schildsche un schdellt's dezu: "Nehmt jeder nur einen Apfel, Gott beobachtet euch". Am onnere End vum Disch is en grooße Deller mit Schokklaadekeks un doo hot en Buu e Schild higschdelld: "Nemmt soviel, wie ehr wollt, Gott baßt grad uff die Eppel uff."

\*\*\*\*\*

E blonde Fraa - es kennt aa en Ostfries, Burgelänner oder Eppschdäner odder irgend än digge Monn soi - will abnemme un frogt de Doggder noch ääner guude Method. De Doggder saat, sie soll en gonze Monat jeden Daag zeh Kilomeders tschogge. Do deet se donn 12 Pund abnemme....un des macht se/er donn aa, werklisch 12 Pund sin weg und sie/er bedankt sisch beim Doggder. Der will sisch des awwer ogugge un sie/er soll glei zuner Unnersuchung vorbeikomme. Do saat die blond Fraa odder de nimmi gonz so digge Monn: "des geht awwer nit, isch bin jo jetzt schunn 300 Kilomeders weit weg".

\*\*\*\*\*

Was e Fraa seschtt: "Do is jo en furschdbarer Dorschenanner. Los jetzd, du un isch missen uffroome. Doi Zeisch liggt uffem Bodde rum un du werschd bald kä Klamodde me hawwe zum Aaziehe, wommer jedzt nit sofort Wesch weschen." ---

Was de Monn heerd: "Blablabla, los blabla du un isch, blablabla uffem Bodde, blablabla, kä Klamodde, blablabla, jedzd sofort!".

Viel Gries in die schää Palz vumm Brigiddelsche aus Wien

# DIE WEE - ÄMM 2006

Also - isch muss schunn zugewwe, dass dess ganze Schbegdakel um die Fußball-WM sogar enn Fußballmuffel wie misch beodruggt hott. Meer hänn sogar e paarmool zugeguggt, wie die verschiedene Mannschafte aus aller Welt sich um denn Gummiballe gegloppt hänn. Meer hänn uns sogar mit Bier unn Schippse oigedeckt, um so e rischdisches Fußballfieling zu grigge - naja, 's weer nit ubedingt needisch gewässt.



Manchmool bin isch als uff de Kautsch wachworre, weil moi Holdie lo laut gschnarxt hott odder isch selwer - awwer dess kummt bloß dodevunn, dass dess immer alles sp schbeet agfange hott. Dess finn isch jo garnit kundefreundlich vunn dere FIFA. Denne ehr Mänätscher känn beschdimmt mojen lang ausschloofe. Am Afang geht 's jo grad noch so, awwer wann dann im Achtel-Dingsbums noch die Verlängerunge unn dess Elfmeederschieße dezukommen, do sinn ferr uns "alde Leid" doch schunn längscht die Bettkaade gelocht. Die meischde Leit missen doch mojen frieh raus - unn wann isch dann an die viele Kinner denk, die jo uff de ganz Welt begeischdert mitfiebern, do weer 's velleischt agebrocht, beim negschde Mool e bissel frieher azufange.

Zu dere Schbieltechnik selbscht kann isch nit viel sage - dess war so wie immer beim Fußball, dass sisch oft und lang die Kigger in de Mitte vunn Schbielfeld rumgebalgt hänn - dauernd de Balle im Aus war - wann endlich mool ähner losgewetzt iss unn hot ganz allää e Door gschosse, dann war 's abseits unn dauernd hott ähner mit schmerzverzerrdem Gsischt uffem Bodde geleje - vunn wege fair unn schbortlich. Wann isch do Schiedsrischder wehr, do deht isch so viel gelwe unn roode Kaade verdähle, dass ich middem Ruggsagg uff de Blatz gehe misst.

Wann 's nooch meer ging, missten jo a in jedem Schbiel mindestens 10 Doore falle, weil dess jo ferr uns Zuschauer dess Greeschde iss. Bei fascht gleich guude Mannschafte kummt jo selde mool ähner bis zum Kaschde durch unn meer waaden vergeblisch uff die dolle Parade vunn denne Doormänner. Isch mähn, frieher war dess annerscht. Do hott 's efter gerumbelt im Kaschde. Velleischt solldense die Doore äfach brääder mache odder dess bleede Abseits abschaffe odder mit zwää Balle schbiele odder was wäas isch!

Am allerschännschte bei dere WM war awwer, dass die Leit sisch mool widder ähnisch waren - unn zwar uff de ganze Welt unn die Deutsche sisch vunn ehre guude Seit hänn zeige känne. Do hott so manscher geglottzt, wie glor 's doch bei uns iss. All hänn sisch gfräat unn ah die, wu verlore hänn - wennigschdens hinnenno. Vor lauter Begeischderung hänn iwweraal hänn an de Audos die deutsche Fahne gebambelt unn hänn gezeigt, dass merr all zsammekehren. Obwohl isch denk, dass bei denne Fahne-Orgie ah e bissel de kindliche Schbieldrieb rauskumme iss, der doch schließlich in jedem vunn uns schdeggt.

Aller - schäh war 's - unn meer werns so schnell nit nochemool erlääwe.

Walter Rupp

## Wanns im Esel(fant) zu Wohl werd...

`S war grad mol widder so in Daag, wu e bissel Zeid war zu iwwerlege, was mer gemeinsam unnerneimme kennd, wann des Enkelsche iwwers Wocheend do is. `S Enkelsche, dess is e 8-jährisches Energiebindel wu ständisch neie Ideje produziert unn die werren zuallererschd bei de Oma unn beim Oba ausbrowierd, dort is anscheins de geringschde Widerstand.

Mit unsre eigene Kinner hämmer soviel Ferz nit gemacht. Awwer ganz im Vertraue, wanns annersched wer, deht ebbes fehle. Nooch so am Wocheend is mer als fix unn ferdisch, awwer kaum is der klääne Quälgeischd fort, kammers nit abwarte, bis er widder kummd.

Aller guud, kummer widder zurigg - blötzlich in Geischdesblidz: „Dess Kind gried Schlittschuh!“

De Combjuder oigschalde un bei EBAY geguggd, obs was Ginschdisches gibt. Tatsächlich, e Paar nagelneie Markeschlittschuh - genau die richdische-, mitgschdeigert unn tatsächliche beim halwe Neipreis de Zuschlag griggd. Die Schlittschuh sinn kumme, `s Enkelsche is kumme unn `s Wetter fer ins Ludwigshafener Eisstadion war ideal.

„Lea, gugg mol was isch do hab - mer gehen jetzt uff die Kufe!“

„Opa, ich kann doch garnicht Schlittschuh laufen.“

„Dess macht nix Kind, isch kann a nit. Doin Babba hot mer soi Schlittschuh gelehnt, mer browierens äfach“.

So hämmer a gemacht. Im Eisstadion simmer zunäggschd ganz ängschdlich unn wagglich die erschede uusichere Schritt uffem Eis geloffe. Dann hab ich fer jeden vunn uns so e Lauf-Lernhilfe in Form vunn rem Mainzelmännche uff Kufe midd zwää Griff zum Feschdhalde (eigentlich bloos fer die Klänschde) fer je 3 Euro ausgeliehe.

Dodemit hotts sofort geklappt. Mit jedre Rund wu mer gedrehd hänn im Stadion simmer sicherer worre. Dann hämmer „Fange uffem Eis“ gschbielt unn noch re halwe Stunn hot de klä General beschdimmd, dass mer jedzd die Mainzelmänncher nimmi brauchen. `S is a wirgliche ganz gut ohne gange unn der kläne Grabbe hot sich köstlich amisiert.

Blödzlich duhds in Schlag un mich reissts knallhart uffs Eis. Des kläne Luder lacht sich halwer kabutt unn lossd sich vor lauder Iwwermut a newer mer hiefalle. Warschoins hott se gemäänd, ich hedds fer extra gemacht. Mit moim schwarze lange Mantel, jedzd weiss wie in Schneemann, hab ich versucht, langsam widder uff die Bää zu kumme, do klattschd se mich ab un sagt: „Super Opa, aber jetzt musst Du mich wieder fangen.“

Inzwische sinn 3 Woche vergange, de linke Arm kann ich widder einigermaße bewege unn die blaue Flecke am Bobbes verlieren a langsam ehr Leuchtkraft. Geschdern hot `s Enkelsche aagerufe, sie kääm am Wocheend un ging so gern widder midd mer Schlittschuhfahre !!

Ich habs nit iwwers Herz gebrocht „nä“ zu saage ...

Reinhold Wirth



## Zwiwwel-Ingwer-Ananas-Chutney - scharffffff !!!

Wie meer's gemacht hänn:

E große Pann voll Zwiwwle, e paar schääne Leffel  
Hoonisch dezu unn dann erscht mool e bissel riehe.  
Dann enn Haufe glää gewärfelde Ingwer dezu, e paar  
gschniddene Chili-Schoode odder roodes Paprika, e  
schäänes Haifel Curry unn Kardamom, e paar Leffel  
Salz+Maggi+Peffer+Chili-Pulver unn zwää Dose  
Annanasschdiggelscher mitsamt de Brieh.



Bei sowas kammer immer schdark variiere unn noch  
alles Meeglische dezumache odder ah weglosse. Wer's gern arg scharf hott, der  
wääs schunn vunn wass er besonders viel dezu duht !!!

Dess ganze werdd dann so ganz langsam 3-4 Schdunn oiköchle losse - ab unn zu  
rummriehre, dasses nit obrennt.

Der foine Duft, der dann e paar Schdunn durchs Haus zieht, iss fascht nit  
auszuhalde - do griggt merr Luscht uff wass Gegrilltes - naddierlich mit dem  
frische Chutney dezu. Zu're Keeseblatt schmeggt des Zeig jo ah sooo foi !!

Dess hääße Zeig kammer in Gläselscher fille unn brima im Kiehlschrank  
uffheewe.

Helge Rupp

---

## Rädseluffleesung aus Nr. 16:

### FRANKENTHAL-FLOMERSHEIM

Es hänn gewunne:

**1. Breis** = 1 Kaffeemaschien

Spende: EDEKA-Markt/Fam. Scholz

Ronald Mappes - Flomerschumm

**2. Breis** = 1 Gläserset

ebenfalls vumm EDEKA-Markt

Rosel Firmery, Ebbschdää

**3. Breis** = 3 Flasche Loreley-Woi

Spende: Loreley-Touristenservice Hoffmann, Bornich, Lorleyring 2

Iris Fischer - Flomerschumm



... unn glei geht's weiter mit dere Rädslerei: 

Sie känn sisch dodevor bis zum End vumm Jahr Zeit losse.

Aller dann, mitmache - 's gibt ah widder wass zu gewinne.

Die Leesung dann bei de Keramikwerkstatt Rupp in de  
Fränsemer Schdroß 107 bis zum 31. Dezember 2006 oischmeiße.



Ehr liewe Hausfraue all, wus  
Gebabbel-Heft abonniert hän:

An Eich hab ich heit mol gedenkt un  
Eich mol e paa Haushaltstipps  
gsammelt, die waren zwar  
ursprünglich uff hochdeitsch  
erfasst, awwer ich denk, nur  
pälzisch bassen die in unser schä  
Gebabbel-Heft. Merr muss halt e  
bissel mitdenke.  
Aller, los geht's!



**Jeder Herd braucht en Hawwe!** Hoscht

en Gasherd, dann isses Esse schneller gar als uff Elektrokochblatte. Bei Gasherde  
muschd jedoch Häwwe mit dinnem Bodde aus gut die Wärm leidendem Madrial  
verwende.

**Kä Haut:** Uff doine Subbe bild sich ke Haut, wonn du ebissel Budder noiriehschd.

**korzie-Kochzeit:** Subbegemies darfschd erschd 30 Minudde bevor die Garzeit beend  
is, in die vorbereit Brieh gewwe, sunscht gehen derr die ganze gude Gschmacksstoffe  
verlore.

**Hülsefrüchte** wernn schneller wääsch, wann du dess Salz erschd korz vorm Garwerre  
noigibschd.

**Karodde- (Möhre-Gelleriewe) Schnellgang:** Die Kochdauer von Karodde, odder  
vornehm gsaat: Möhre, kannscht wesendlich verkerze, wann du beim Uffsetze en  
Essleffel (odder e bissel wennischer) Zucker dezumachscht. Dann hän se außerdem en  
besonders zarde Gschmack.

**Brühwerfel-Aroma:** Brühpaschde oder -werfel verlieren ehr Aroma, wann se die ganz  
Zeit im Esse mitkochen. Es iss besser, wann du die Paschde odder denn Werfel erscht  
speeder dezugibschd.

**Mettworscht-Kuggle:** Winzische Kiggelscher, aus me Reschd Mettworscht gformt,  
sinn e pikandie Oilag ferr e klari Brieh.

**Sellerie-Kraft:** Fläschbrieh schmeckt ganz doll, wann frische, gescheelde  
Sellierwerfelcher drin ziehe loschd. Un jedi Hausfraa weef: Sellerie stärkt die  
Manneskraft!

**Odicke:** Eier zum Verfoinere odder zum Odicke vun Speise gerinnen net, wann du e  
paar Dreppelcher Zitronesaft und 3 bis 4 Essleffel Milch unneriehschd. Die Supp  
odder Soß muschd awwer vorher vum Herd nemme. Zum Odicke vun Schaumspeise  
darfschd ke Krumbeermehl verwende, weil dess Mehl dess Schaumischerre  
verhinnert.

**Budding-Wunner:** Budding brennt beim Koche net o, wann du de Hawwebodde vorm  
Koche mit e bissel Budder oifettschd. Unk ä Haut kriggt de Budding, wonn denn noch

em Koche leicht mit Zucker beschdreschd.

**Grundregle ferrs Schelliere:** Alle Geräde un Gfäße missen fettfrei soi. Bräde, flache Häwwe sinn besser ferr de Oidickungsprozess. Klennere Portione schellieren besser. Schellee derfschd während demm Erkalde net bewege, dess schdeert de Schellierungsprozess.

**Rhabarwer:** Der braucht wenischer Zucker, wommern noch em Wesche un Schneide noch roh mit Zucker beschdreut un e paar Stunn odder iwwer Nacht stehe losst. Dann verliert de Rhabarwer nämlich soi Säure.

**Kloß-Kniffe:** Pirogge, Kleeß un ähnliches duschd am beschde mit me Siebleffel aus em Kochwasser hole. Awwer dess werschd jo wisse. In die Schissel leggschd zuvor e umgschdilb die Unnertass noi. Do kann dann dess iwwerschissische Wasser noch gut abdrobse. Iwwrischens: Kleeß kochen net ab, wonn du demm Salzwasser e bissel ogequirldes Mehl zugibschd. Un Grumbeerkleeß (z. B. Schneebällscher) bleiwen weiß, wann du ins Wasser en Schuss Essig machschd.



**Reddung in letschder Not:** Grumbeerscheiwe kennen e Supp odder en Oitopp redde, wann du zu verliebt warschd, soll heeße, wann du zu viel Salz drogemaakt hoschd. Die rohe Grumbeerscheiwe muschd ugfähr 10 Minudde in demm Esse ziehe losse.

**Grumbeersalat:** Ich hab gelese: Die Grumbeere ferr denn Salat kennt merr ohne Probleme mit me Eierschneider schnell in Scheiwe schneide. Hab ich browiert. Moin Eierschneider hott de Geischd uffgewwe. Vielleicht hoschd du jo en bessere. Dann kannschd´s mol selbschd prowiere. Awwer´s geht a nix iwwer ganz dinne Grumbeerscheiwe ferr so en gude Grumbeersalat. Un die schneid merr am beschde mit de Hand.

**Pikande Grumbeerbrei:** De Grumbeerbrei schmeckt besonders gut, wann du mit de Grumbeere zusamme e Zwiwwel kochschd, mit de Grumbeere zamme pürierschd un dann unner de ferdische Grumbeerbrei e bissel geriwwene Käs machschd.

**Blummekohl:** E paar griene Blättcher zum Blummekohldünschde gewwe, dess macht dess Gemies herzhaftder. Gibt merr en Schuss Essisch ins Kochwasser, bleibt de Blummekohl weiß.

**Bliedeweiß Zellerie:** Beim Koche hot de Zellerie meischd so e graudreckischi Farb. Um dess zu vermeide, muschd die Knolle (nadierlich gebutzt) e paar Stunn vorher in Essischwasser legge dann bleibt der Männergsundmacher bliedeweiß.

**Uffwärme:** Wann du Gemies uffwärme willschd, machschd dess am Beschde im Wasserbad. Dann schmeckts wie frisch. Dess gleiche gilt a ferr iwwrish gebliwwene Bohnekafee.

**Schbinat:** Dess gude Gemies behalt beim Koche im offene Hawwe soi grieni Farb,

**Wie gemalt:** Wann du e bissel Zitrone uff gschniddene Eppel, Beere (uff hochdeutsch Birnen) odder rohe Zellerie dräufelschd, werrn se net braun. Du kannschd se a in Zitronewasser legge, bevor se weider verwenschd.

**Sämisches Sauerkraut:** E rohi Grumbeer reiwe un ins faschd ferdisch gekochde

Sauerkraut gewwe. Dess macht schä sämisch.

**Kohlgeruch muss net soi:** Sauer- odder annerer Kohlgeruch in de Wohnung kannschd vermeide, wann du während em Koche e Scheib Brot uff de Kohl leggschd un zwische Hawwe un Deckel e Duch klemmschd, wu mit Essig ogfeischd hoschd.

**Zwiwwle schneide:** Träne kannschd vermeide, wannnd vorm Schneide die Zwiwwle korz in kaldes Wasser leggschd odder noch äfacher unnerm kräfdische Wasserstrahl abschbiehlschd.

**Schal abziehe:** An Tomade un Quetsche losst sich leicht die Schal abziehe, wann se korz in kochendes Wasser getaucht wern. Beim Schreiwie merk ich, dess iss schun widder aldmodisch. ,S gibt nämlich im me Frankedahler Haushaltswaregschäft schun e spezielles Tomadescheelmesser (un noch ein Tomadekrutzeentferner), wunderbar prakdisch, isch möcht dess Messer nimmi misse. Kiwi lossen sich a gut scheele un bei de Eppel kriggschd hauchdinne Schale.

**Gequellde scheele:** Gequellde kennen besser un sauwerer gscheelt werre, wammer se noch em Koche mit kaltem Wasser abschreckd. Tipp: Kanschd vermeide, wann se doin Mann scheele loschd.

**Kabuddene Eier:** Ogegacksde Eier kennen gekocht werre, wann merr se in Haushaltsfolie wickelt. Die Kochzeit verlänget sich um 2 3 Minudde.


**Alde Grumbeere:** Wann die Grumbeere im Keller so alt worre sinn, äfach in kaltes Wasser legge un dann kammer se widder gut scheele.

**Grumbeerbreipulwer** hochdeutsch: Kartoffelpüreepulver (Fertigpackung): Do drauß kammer net nur ganz schnell en Grumbeerbrei mache, sondern mit demm Pulver a ganz doll Subbe un Soße odicke.

**Knowwloch- odder Kräuterbudder:** Die kammer ganz schnell selwer mache. Budder muschd uff Zimmertemperadur bringe, mittem Knowwloch odder de Kräuter mische ferdisch. Tipp vun meer: E Kaschdeweißbrot in Scheiwe schneide, awwer net bis nunner, unne musses noch e bissel zammehänge. Immer uff e Seid die Knowwloch- odder Kräuterbudder schmeere, in Silberfolie packe un 20 Minudde noi in de Backowwe. Schmeckd doll.

**Tee-Ei.** Dess gude alde Tee-Ei kammer wunderbar als Gewerz-Ei verwende. Wann du z. B. Rotkraut kochschd, machschd doi Lorbeerblatt un doi Nelk do noi, Tee-Ei zu un ins Rotkraut hänge. Wanns gekocht iss, Tee-Ei raushole un kenner vun de Familie braucht mä Angschd hawwe, dass er uff denne Gewerze rumkaut.


**Fehlende Kaffeefilder:** E Stick Kreppbabier kann fehlende Kaffeefilder ersetze Äfach zur Dudd falde un ins Filderfach oihänge.



..s gäb sicher noch dausend Tipps. Awwer ferr heit langt's mol. Viel Spaß in de Kich winschd Eich all die

Ursel Lutz

## 4 AGF- Manager im Stress



Die vier AGF – Männädscher missen e knifflichi Uffgaab löse:

Sie sinn am Sportplatz uffem Beachvolleyball-Feld bis zum Hals im Sand oigegraawe worre. Sie kennen sich absolut nit bewege, nitmol die Köpp drehe. Zwischem Hannemann un denne annere drei, is e uudurchsichdischi, dicki Mauer.

Die vier wissen, dass jeder vunnene in Hut uffhott, 2 devunn sinn schwarz, 2 weiss.

Sie wissen awwer nit, wer welchi Farb trägt.

Um zu vermeide, dass se e ganzes Johr kä Diäte vunn de AGF mehr bezahlt griggen, musses ääns vunn denne schaffe, soi Hutfarb zu benenne. Wann desjänische sich irrt, gehen se all leer aus. E zwäddi Chance gibds nit.

Sie dirfen nit mittnanner redde unn hänn bloos 10 Minudde Zeit zum Noochdenke. Wann ses bis dorthie nit hänn, isses a vorbei.

Hannemann un Borth sehen nur die Wand. Lutz sieht nur Borth, Müller sieht Lutz unn Borth.

**Nooch e paar Minudde sagt eens vunn denne die richdisch Antwort!!!**

Wanns ums Geld gehd, sinn die durch wie e Bloosrohr (Boliddigersyndrom).

*Jetzt froog ich eich: Wer hott die richdisch Farb gewissd unn warum war desjäniche sich so sicher???*

beigschlääfd vumm Reinhold Wirth

# Die Kerweredd 2006

vumm Kerweborsch Rainer Hannemann



Grüß Gott, guten Tag,  
bonjour und a nice Day,  
was bin ich froh, dass ich  
eich seh, jeder der was auf  
sich hält, sitzt heut beim  
TuS im Kerwezelt,  
das iss gut so un so soll es  
auch sein, Kerwe feiert Alt  
und Jung in Flomersheim.  
Besonders begrüß ich den  
städtischen Lenker, den  
Kerweumzug-  
Woiausschenker, ihr wisst  
alle wen ich mein,  
willkommen Herr OB  
Wieder in Flomersheim.

Als nächstes begrüß ich, darauf bin ich ganz wild, Miss Strohhut, Corina Metzger, das städtische Aushängeschild.

Beim Kerwe-Umzug da durfte ich im Cabrio neben ihr sitzen, bei so viel Liebreiz kam ich in's Schwitzen, aber so iss es im Leben halt, ich bin 30 Jahr zu alt.

Und dann grüß ich auch noch wie jedes Jahr, unser jüngstes Ehepaar. Und als ich des gehört hab, ich konnt es net glaube, es Beckers Joachim ist unter der Haube, und Joachim ich denk, ich kenn dich so lang schon, und ich derf des aach saa, ich hab wirklich geglaubt, du kriegst niemols e Fraa.

Doch jetzt seh ich's genau, es hot jo geklappt, du hasst die Sarya zur Frau Becker gemacht. Deine Mutter, die Annelies' iss sicherlich froh, jetzt iss ferr moin Bu aach e annerie do.

Der Fritz Strassner unn sei Fraa, unser ältestes Ehepaar, ist leider in diesem Jahr nicht da. Die Gesundheit spielte nicht mehr mit, bei den beiden kam es ganz dick. Jahrelang haben die uns begleitet, darum hat man uns beneidet, und so kurz nach dem Umzug, ich sag's leicht gequält, es Strassners, die haben heute wirklich gefehlt. Und darum, ich hoffe es ist auch in euerm Sinn, schicken wir die besten Genesungswünsche zu Strassners hin, unn die Frau Strassner kriegt wie jedes Jahr ihren Blumenstrauß, den bringen de Dietmar und ich Ihr persönlich in's Haus.

Vor einer Woche war die Welt in Eppstein zu Gast, das Kerwemotto hat leider auch zu Eppstein gepasst, ein Unwetter war plötzlich da, wie ein Tornado - Made in USA, ich war dort, mein Gott war es mir so bang, zum Glück sind wir

mit der Kerwe erst heute dran, unnn wenn mer auch als vunn hier e bisje uff die Eppstääner schennt, so Kerwewetter haben die Flomersheimer euch net gegönnt, doch es iss net zu ändern, drum grüß ich bei Wein und bei Bier, viele Freunde aus Eppstein zu unserer Kerwe hier.

Wen ich jetzt net begrüßt hab, des sag ich mol hier, soll sich net beschwere, Begrüßung iss eigentlich dem Dietmar sei Bier. Des ist mit dem Dietmar auch so abgestimmt, ich begrüß' die Fraue, er begrüßt den Mann und das Kind. Aber alle Fraue werden von mir persönlich geküsst, jetzt wisst ihr auch warum 4 Tage lang Kerwe hier ist.

Wir Deutschen sterben langsam aus, so hört man es tagein tagaus, wer soll mal - und das ist hier die Frage, euer Rente unnn moi Pension bezahle.



Denn Kinder will heut' keiner mehr - zuviel Arbeit - Erziehung zu schwer und auf was man dann verzichten muss, bereitet vielen heut' Verdruss;

Im Bett wird zwar noch scharf geschossen, jedoch das Ziel nicht mehr getroffen, weil die Chemie ja meistens dann, ein Volltreffer verhindern kann.

Selbst in Berlin ist schon bekannt, keine Kinder mehr im Land, doch in Berlin, ich mein's symbolisch, spricht jedes dritte Kind schon anatolisch.

Und dort macht man sich Gedanken dann, wie man die Deutschen ändern kann.

Uns oftmals die Politiker, dess misst ihr wisse, denen niemals eigene Kinder in die Windeln... gemacht!

Dass dess nix wird - aber wie es geht - hier in Flomersheim ihr seht.

Hier kommen die Kinder dann und wann, sogar im Doppelpack gleich an. In der Zeitung stand's auf Seite 4, sechs Zwillingsspärchen gibt es hier. Für die Statistiker unter Euch, ich hab's recherchiert, wir werden als fruchtbarstes Dorf in de Palz geführt.



Woran der Kindersegen wohl liegt, hab ich mich gefragt, ei an de

Zwiwwele hot mir so en Alte gesagt, auch Eier tun der Mami gut, wenn sie Papa Essen tut! Hast du also Liebe im Herzen, Eier und Zwiebeln im Bauch, dann wirst du ganz sexy unnn mit de Kinner klappt's auch.

Die Erklärung schien mir zu einfach, drum nehmt mich beim Wort, dahinter steckt so glaub ich - de Dietmar Borth. Doch halt - net wie ihr denkt, dess möchte ich eich saa, der iss froh wann er rumkommt bei de eigene Fraa, hier geht um was anneres, des möchte ich betone, hier geht's nicht um Liebe, hier geht's um die Kohle.

Wird hier nämlich ein Kind geboren, geht es statistisch net verlore, es zählt als Einwohner vom Ort, dadurch steigt das Gehalt vom Borth. Weil dieses sich nach der Einwohnerzahl richtet unn des is wohr und nicht gedichtet.

Und kommen dann Zwilling, so kann ich Euch sagen, hat er sozusagen zwei Fliegen mit einer Klappe geschlagen. Also immer dann, wenn hier im Ort mit Babys was geht, sich Dietmars Kontostand erhöht.

Wenn in einer Familie dann, ein sechstes Kind kommt dann und wann, und ist es ein Junge, dann hat er Glück auf Erden, denn Dietmar wird sein Pate werden. Wird es ein Mädchen, do werds meischtens deier, des macht aber dann seine Vertreterin, die Heike Firsching-Haselmeier!

Und beim siebten Kind, dess misst ihr wisse, gibt es keine Kompromisse, so einem Glückskind macht man dann klar, du darfst zum Oberbürgermeister Onkel Theo saa.

Drum rufe ich den jungen Paaren hier zu , gebt heute Nacht zu Haus keine Ruh; direkter will ich jetzt net wern, sie kennen schon des Pudels Kern.

Und hier sag ich Euch damit ihr's wisst, dass die Machart an den Kindern das schönste ist.

Wenn **Mann** es noch nicht kapiert hat, dem sag ich jetzt wie's geht: Also - wenn außer dem Wecker noch was anderes steht, nix an außerm Licht aber an de Fieß noch die Socke, des gibt sechs Pfund schwere Kinder mit ganz lange Locke. Wer es noch net kapiert hat kommt nachher zu mir, ich geb' privat gute Tipps beim e scheene Glas Bier....!



Die Kerwe- Aktions-Kinner kommen im Wonnemonat Mai dann zur Welt, vom Staat gibts reichlich Kinnergeld, so saniert man auch die Haushaltskass', man kommt in e annerie Steuerklass' und das Personal von Schule und Kinnergarte, hat Arbeit noch für viele Jahre.

Und wir sind halt ein Vorort von einer Stadt, die für Familien mit Kinder wirklich alles hat.

Also kommt über die Kerwe zu Haus schon zur Sache, das ist wichtig für Deutschland, dass iss net zum Lache. Aber dass Lachen der Kinder, dass ist euer Lohn, unn die Rente iss gesichert und aach moi Pension.

Ei ich hab jo im Zelt die Maria erblickt, Frau Professor Böhmer, Sie hat ja der Himmel geschickt. Was Sie eben gehört haben, wird man in Berlin nicht fassen, mit diesen Ideen können Sie die Wuz dort rauslassen, in der Pfalz, so können sie sagen, hat man es erkannt, dort löst man das Rentenproblem mit leichter Hand. Es ist ja ganz einfach und gar nicht verkehrt, es kommt halt immer drauf an, wie man es dem Volk auch erklärt! Und wenn man sie fragt, woher sie das han, dann sagen sie

Flomerschumm - Kerweborsch - Hannemann!

Pfarrer werden ist nicht schwer, Sargträger sein dagegen sehr. Man soll auf Kommando und das muss man kenne, traurig gucke un aach flenne, nicht erzählen und langsamer Schritt, sonst kommt de Parrer net mehr mit. Und das fast noch jeden Tag, so steht es im Sargträger-Vertrag: Schwarzer Anzug, Schlips und weisses Hemd, wird im Vertrag auch noch genennt. Wer dich **so nicht** begleitet zur letzten Ruh', wird schwer kritisiert von der CDU.

Und dass die Kritik vumm e Flomerschummer kimmt, hat manchen etwas missgestimmt. Denn wenn so was in de Zeitung steht, schnell im ganze Land rum geht, und so was, ich sag's jetzt ganz hart, schadet dem Ruf der ganzen Stadt.

In so einem Falle ruft man dann, den Günther Lättsch im Rathaus an, der sich außer Sozialdezernent auch noch Hüther aller Gräber nennt, und erzählt ihm dann vom Sargträger-Übel, dess iss der gewohnt, der kriegt täglich Prügel. Und erst wenn man jetzt nicht reagiert, wird der Stadtrat informiert. Die Kritik war ja angebracht, es kommt halt immer drauf an, wie man es macht. Geht man also so sensibel vor, schießt man sich kein Eigentor, und wird auch nicht, dass muss merr wisse, von der eigenen Fraktion noch angeschisse.

Ein gravierender Fall aus dem Beerdigungswesen, wäre in diesem Jahr in Eppstein gewesen.

Bringt man dich dort zur ewigen Ruh, ging es nicht immer pietätvoll zu.

Die Sargträger der Kommune, so konnte man lesen, wären schneller als der Herr Pfarrer gewesen, wenn dess stimmt, dann kann ich's net versteh', ich hab noch nie en schnelle Mitarbeiter bei der Stadt geseh'. Wie ich des gelese hab, hab ich merr gedenkt, vielleicht hot aach de Parrer aus Maxdorf gepennt, weil der in Eppstää de Friedhof net kennt.

Auf dem Wege zum Grabe hätten die Sargträger laut erzählt, so berichtete der Pfarrer der Zeitung gequält, und ganz ohne Grund, sagte der Pfarrer betroffe, wären die plötzlich in eine andere Richtung geloffe, gehalte hätten die erst - und dann kam der Dreh', als die dess Ortschild vunn Flomerschumm geseh'! Zurück auf dem Friedhof und jetzt kommt der Schlag, den Sarg versenkt sofort in's Grab, jetzt dreht sich Herm Pfarrer der Magen um, ei do warn ja noch die Blumme drum. Der Pfarrer war ganz aufgebracht, hinterher die städtischen Träger laut zur Schnecke gemacht. „Die Blumen sollten vorher runter, das war eure Pflicht“, es haben alle gewisst - nur die Sargträger nicht.

Es gibt manchmal doch sehr schlechte Tage, dass ist leider keine Frage, doch so etwas passiert halt nicht, wenn man vorher miteinander spricht.

Und hier mein Kommentar dazu, begibst du dich zur letzten Ruh', sozusagen auf deine letzte Reise un wohnst in Eppstää - dann ist es ... Mist!

De Eppstääner sag ich, wenn man mich jetzt kritisiert, wäre des gleiche in Flomersheim passiert, dann hätte ich, wie ihr mich kennt, genau de gleiche Text verwend', doch in dem Fall, do hatten mir halt Glück, es war nun mal in Eppstää, es war iwwer der Brück'.

So, jetzt mach ich wieder Schluss, weil ich jetzt mol was trinken muss.

Euch allen wünsch ich, dass ist keine Frage, viel Spaß auf denFlomerschummer

Kerwetagen.

Dem TuS wünsch ich ein volles Haus, leider siehts nach Regen aus.

Soll auch das Werk den Meister loben, doch Regen und Segen kommt halt von oben. Etwas könnte man vielleicht dran dreh, wenn ich euch morgen früh in der Kirche all' seh'. Bei der Predigt uff pälzisch, könnt ich mir denke, könnt man die göttlichen Schritte noch lenke, bei stillem Gebet und in Eintracht mit dem Herrn, könnt es Wetter eventuell noch besser wernn.

Ich mach mich jetzt vom Acker, den nach mir ist dann, der Vorstand vom Kerwewirt TuS Flomersheim dran. Dann kommt auch das wichtigste für einige hier, nach seiner Begrüßung gibt's kostenlos Bier.

Auch diese Kerwerede, die hat nix gekoscht,

Macht's gut, auf Wiedersehn im nächsten Jahr - Prost!

Rainer Hannemann - Kerwe-Samstag - 26. August 2006

De Johannes Paul kummt in de Himmel unn schdeht vor de Deer. De Petrus froogt nooch soim Name.

"Ich bin de Pabscht!"

"Pabscht, Pabscht, Pabscht" brummelt de Petrus unn bläddert in soim digge Buch - "duud merr lääd, do iss niemand mit dem Name".

"Wass - dess gibt's doch nit, isch bin Gottes Schdellverdräter uff de Erd!"

Petrus: "Do hodder merr awwer noch nix devunn gsaat - nä, nä, der hott doch iwwerhaupt känn Schdellverdräder uff de Erd".

De Johannes werdd ganz rood vor Zorn: "Ich bin's Owwerhaupt vunn de ganze kadollische Kärsch !!!"

"Kadollisch Kärsch - hab isch jo noch nie gheert - wass sollen dess soi? -- awwer waad emool, isch froog de Schäff".

Petrus diest ab durch die Wolke unn schdeht ball vorm Herrgott: "Heermool Boss, do aus schdeht Ähner, der behaubt, dass er doin Schdellverdräder uff de Erd weer - der hääßt Pabscht - sescht deer dess wass?"

"Nä - kenn isch nit, do wääß isch nix devunn - awwer enn Moment, meer froogen mool moin Junior. Jeeesus - kumm mool her Buwel."

De Jesus kummt agewetzt: "Ja Babbe, wass iss los?" De Gott unn de Petrus erglären ihm um wass es geht.

"Dess iss jo gelunge, denn Kerl muss isch merr mool agugge - isch bin glei widder do".

Nooch e paar Minudde kummt er widder unn lacht, dassem die Drääne runner laafen: "Isch fasses nit - erinnern ehr eisch noch an den glääne Fischerveroin, den isch vor 2000 Jahr gegrindt hab - denn gibt's heit immer noch !!!"



## Die Drillerpeif

Noch bis in die sechziger Jahre sinn die Ziech in Flomerschum vum Bahnhofsvorschteher abgewunke unn abgepiffe worre. In voller Uniform, mit ener rode Signalbletsch unn ener Drillerpeif hott der die Ziech abfahre losse. Domols isch erinner misch noch gud war des en große, staddlische „Uniformierte“ unn mit seine graue Hoor hot er Klasse aussehe, merr kann sache, e schönes Mannbild. Isch wees de Name noch, awer isch sagen net. Die alde Flomerschummer sollen e bissel nochdenke.

Des Umfeld von Bahnhof, Schul, Verladeplatz, Woogheisel, war nadierlich a unser Revier. Fer moin Hund hab ich immer a Drillerpeif debei ghabt. Die is ach manchmol „missbräuchlich“ benutzt worre... so ach domols am Bahnhof. Kaum war des "bitte einsteigen und Türen schließen“ zu here, wa ach schunn moi Drillerpeif aus unserm Verschdeck in Aktion. De Bahnhofsvorschteher unn de Schaffner hänn sisch verdutzt ageguggt unn es hott e paar Daach gedauert, bis se den Peifer ausfinnisch gemacht hänn. Isch hab dann moi Drillerpeif gesche eni mid em annere Ton ausdusche misse. Bosch



## Die Kohleklauer

Die alde Flomerschummer werren sich noch dra erinnere, ann de alde Riewe-Verladeplatz uff de Rickseid vum Bahnhof. In de Saison im Herbschd sinn die Baure aus de ganz Umgeung mid de Fuhrwerge belade mid Zuggerriewe kumme unn hänn alle Daach ganze Ziech voll Riewe gebrocht. Vumm Verladeplatz aus sinn die Waggons noch Frankedal gfare un zu „Frangedahler Sunn“ verschafft worre. Durch des viele Ranschiere war de Flomerschummer-Ebstäner Bahniwwergang dann mehr zu als uff. Die Heizer vunn de domolische Dampfloks hänn die Wardezeide zum Uffheize vunn ehre Kessel genutzd. Bei dere Ärwet sinn alsemol Kohlebrogge vum Tender gfalle, die mer Buwe uffgelese hänn. Ehr misst wisse, in dere schlechde Zeit waren Kohle knapp un arisch deier. Die Leid uff de Lok hänn awer mit Absicht fer uns Kinner a große Brogge runnerschmisse, unn sich gfreed, wann mer uns fascht gekloppt hänn, wesche dem domols so wertvolle „schwarze Gold“.

Als mer amol uff de äne Seid die Brogge uffgelese hänn, iss de Walder vunn de anner Seid - er hot kleddere kämme wie e Eichhensche - uff de Kohletender gegrawwelt unn hot sisch „selbscht bedient“. Awwer die Heizer hänn dess gemerkt unn mid em große Wasserschdrahl hänn se de Walder „abgeschosse“. Tretschnass awer mid em Säckel voll Kohle is er dabber abghaut.

*"Ich spende auch in diesem Jahr - eine kleine Gabe - ist doch klar.  
Denn was im Flomerschmerr Gebabbel steht, jedem unter die Haut geht.  
10 Jahre habt Ihr das schon toll gemacht - weiter so - das wär gelacht!"  
Einen lieben Gruß an das AGF-Team - Inge Reinhardt*

## Schbende ferr 's Gebabbel-Heft

Liewe Leser unn Freunde vumm Flomerschummer Gebabbel,  
**die AGF bedankt sich vielmools feer die freundliche Schbende,**  
die seit dem letschde Heft widder bei uns oigange sinn.  
Naddierlich siss die AGF weiterhie dankbar ferr Ihr Unnerschditzung -  
ferr 's Gebabbel-Heft unn ferr alle annre Brojette, die noch kummen.

**AGF: Sparkasse Rhein-Haardt**

**BLZ: 54651240**

**Konto Nr. 240030106**

Rainer Hannemann, Leiniger Str. 12, Eppstein  
Christl + Rolf Müller, Händelstr. 3, Eppstein  
Ursula Lutz, Freinsheimer Str. 104, Flomersheim  
Michael Gaida, An den Pflanzgärten 13, Flomersheim  
Helge + Walter Rupp, Freinsheimer Str. 107, Flomersheim

An die Adresse kammer sisch ah wende, wammer die umfangreich  
Chronik vunn de AGF als  
**48-seidische Schwarzweiß-Broschüre ferr 5 €** oder als  
**Farbausdruck mit em Haufe Bilder ferr 30 €** oder die  
**CD mit demm gleiche Text unn alle Bilder ferr 10 €** oder dess  
**Flomerschummer -Gebabbel-Heft** oder die gelb/griene  
**Flomerschummer Babbierfähnscher - 10 St. ferr 3 €** oder enn  
**Flomerschummer Anschdeckpinn ferr 2,50 €**  
kaafe oder beschdelle will.

**Imbressum:** Idee/Gscheidung/Rätsel: Walter Rupp  
Redagzion: AGF-Arweitskreis "Flomerschummer Gebabbel"  
Druck: Fa. Erdelmeier - Medienagentur. Druck. Verlag - Worms  
Beidrääg bidde abgewwe bei Rupp, Fränsemer Str. 107, Flomerschumm  
Drucxksfehler sinn beabsischdischt unn zur Unnerhaltung oigebaut.  
Flomerschumm im Okdoower 2006 / Ufflag 300 Schdigg